

Monografia dalla famiglia de Mont en Lumnezia

La Fundaziun de Mont ha ediu ina publicaziun dil historiograf Martin Bundi davart la schlatteina de Mont

DA MARTIN CABALZAR

■ **Las famiglias de Mont da Vella, de Castelberg da Mustér e de Capol da Flem ein stadas el temps dalla Ligia Grischa dinastias politicas da gronda reputaziun ed influenza. Egl ambient historic dil Casti de Mont a Vella, la sedia tradiziunala dalla famiglia aristocrata dalla Lumnezia, ha l'editura Calven presentau l'ovra «Familiengeschichte der de Mont aus dem Lugnez» ord la plema dil valent historiograf grischun Martin Bundi.** L'idea da realisar ina historia da famiglia ei naschida igl onn 2000 a cuschun d'ina viseta da *Reto Demont* (Domat) – in descendent dalla dinastia numnada – el Museum retic a Cuera. Ad el eis ei allura reussiu da gudignar *Walter Lietha* sco editur ed ensemen cuagl autur *Martin Bundi* han els elaborau in concept per ina presentaziun raquintonta e bein legibla dalla historia muentada da quella schlatteina notabla e reputada. Per garantir la finanziaziun dil project voluminus ha Reto Demont mess en pei la «Fundaziun de Mont» cul giurist *Lorenzo Schmid* (Arosa) alla testa. La fundaziun serestrenscha buca mo silla publicaziun dalla historia dalla famiglia de Mont, anzi ella vul era promover la cultura egl intschess dall'antieriura Ligia Grischa ed era sustener projects socials ni persunas en pitgiras finanziaias.

Eruir ils connex

Silla tribuna dalla historia da famiglia dalla schlatteina de Mont sepresentan personalitads marcantas (umens e dunnas) e quei sin palancau politic, militar ed ecclesiastic. La finamira digl autur Martin Bundi eis ei stau «da percepir ils singuls acturs dallas famiglias de Mont en lur far e demanar differenziau e da metter lur agir en in context politic, social e sociologic» da lur epoca. Cheutras reflectescha la cronica dalla famiglia de Mont era ina gronda part dalla historia dalla vallada, dalla Ligia Grischa tangond schizun la politica da pussonza europeica da siu temps. Tut tenor la relevanza publica dallas singulas personalitads ein lur biografias daventadas pli cuortas ni pli extendidas.

Sco detagl interessant intervegn denter auter era daco ch'ils da Castrisch ein vegni en possess dalla Alp Cavel en Lumnezia. Apparentamein ein ils da Castrisch senezegia dalla cuschun da vender en connex culla reformaziun igl inventari sacral per puder ademplier lur basegns d'alpegiaziun e cumprond successivamein ils dretgs dall'Alp Cavel ch'era oriundamein per gronda part en possess dils de Mont da Vella.

Ina dallas empremas personalitads da gronda influenza dalla schlatteina



Il Casti de Mont culla caplutta da s. Roc e la Casa dalla Posta ch'ei stada entochen 1947 medemamein en possess dalla famiglia de Mont e sia descendenza.

FOTOS MAD

dils de Mont ei il caulgia e guvernatur da Valzlina Gallus de Mont (1537–1608) staus. El decuors da sia veta eis el setransformaus d'in partisan dils Franzos ad in adherent dalla partida spagnola.

In auter, Melchior de Mont, ei staus in excellent militarist en survetsch franzos. Suenter siu retuorn en patria eis el staus ugau episcopal a Farschnò e sedistinguius sco benefactor dils paupers. El ei morts 1661 e satraus ella catedrala da Cuera.

Ella liunga gliesta dils dignitaris clericals stat s'entelli cunzun il precieu Duri de Mont (1624–1692) che ha occupau rodund 30 onns la sedia episcopala a Cuera.

Sco Lumnezian ed uestg romontsch ha el era promoviu essenzialmein publicaziuns dalla litteratura religiosa che ha giu da quei temps ina fluriziun apartia en Lumnezia (Zacharias da Salo, Balzer Alig etc.) e la construcziun da numerusas baselgias e capluttas en Lumnezia.

Il representant principal dils numerus officiers dalla famiglia de Mont ei bein general Giusep Luregn Demont (1747–1826) staus. La presenta monografia da famiglia sclarescha denter auter era sia rolla en connex culla invasiun franzosa en Surselva digl onn 1799.

Da de Mont tier Demont

La historia dils de Mont sestenda dils fastitgs historics cumprovai da 1308 entochen als de Mont/Demont dil 20avel tschentaner. Igl onn 1848 ha il cussegl grond decidiu che las titulaturas aristocratas «de» astgien buca vegnir duvradas pli officialmein. Quei ha muntau ch'ils de Mont da Vella han buc astgau duvrar vinavon lur presilha da noblezia «de». En consequenza da quei conclus han ils biars dalla famiglia applicau il num Demont, auters Mont e mo singuls han duvravon vinavon il de Mont. Quellas differentas scripziuns han denton procurau per dabilia malsegirtads e confusiuns, aschia ch'igl Uffeci civil da Vella ei sedrizzaus 1946 alla regenza grischuna culla supplica d'eliminar quella malsegirtad giuridica. Quei ei lu era capitau culla decisiun da 1948 che decretescha che las famiglias astgien duvrar egl avegnir sulettamein las denominaziuns «Mont» e «Demont».

Fluriziun e digren

Sco quei ch'igl autur Martin Bundi s'exprima egl epilog lubescha la revista dalla historia dils de Mont da clamar en memoria aunc ina gada fluriziun e digren d'ina famiglia da noblezia ord «Alt fry Rätien». Ord mudestas entschattas dalla aristocrazia campestra ch'ei stada per temps en survetsch ministerial digl uestg ei sortiun adi-

na puspei personalitads che han agiu independentamein el ravugl dils giunchers da noblezia dil Grischun. Naven dil temps medieval tardiv han ils de Mont occupau successivamein uffecis politics el vischina, ella vischnaunca, ella vallada ed ella Ligia Grischa. La famiglia de Mont ha giu la cuida da metter buca meins che 15 caulgias che han exequiu lur uffecis tut en tut duront total 40 onns ed ha aschia exequiu il pli ditg quei uffeci. Ils de Mont vegnan secunda dils de Castelberg cun 34 onns e de Capol con 26 onns d'uffeci.

Parallelmein han els acquistau in considerabel schischom ed amplas facultads. Entras ina politica rufinada da maridaglias denter per han las famiglias aristocratas francau e rinforzau possess e pussonza. A quella basa solida d'existenza materiala han s'enteli las entradas e pensius ord survetschs jasters contribuui essenzialmein.

Per reputaziun – denton tut secund era per fastedis e sperditas – ha l'occupaziun d'aunts uffecis politics ellas Treis Ligias ed en Valzlina sco era la direzzion militar dallas truppas en survetsch jester purtau. Ferton ch'ils umens eran savens absents dil liug per pli liung temps vevan las dunnas buca darar da s'occupar perulas dall'educaziun dalla feglialonza e dall'administraziun da casa e cuort.

In tagl decisiv ella historia dalla ari-

stocrazia grischuna ha ei dau entuorn igl onn 1800 culla fin dallas Treis Ligias. El medem temps ein denton era entradas tradiziunals ord survetschs jasters svanidas, senza ch'ins sappi cumpensar las sperditas. En quei connex ei semusau ch'ils members dalla famiglia de Mont han buca giu sempel da s'adattar allas novas circumstanzias.

In dils davos representants dalla lingia da Löwenberg-Schluen ei il baron Johann Heinrich de Mont (1788–1856) ch'ei seretrags a Meran el Tirol e che ha vendiu il Casti da Schluen a Salesius Brunner staus.

Aschia ei il radius d'activitad dils de Mont selimitaus dapi 1800 pli e pli sin palancau communal, circuitual e cantunal. Negin dils dalla renomada famiglia dils de Monts ha la finala giu la cuida d'acquistar in mandat politic sin plaun federal ni far ina carriera briglianta egl exteriur. Ils biars descendents dils de Mont dalla generaziun contemporana ein daventai solids burgheis, engaschai sco scolasts, plevons, mistergners e purs.

Illustraziuns e genealogia

La nova publicaziun sedistingua entras sias illustraziuns che portan bia dapli che ina sluccada dil text. Ella tonscha naven da documents historics sur purtrets, tablas commemorativas, fotografias da casas, dessegns e plans sur fotografias ord l'aria fatgas apostas per quei cudisch. Las fotos ein vegnidas elaboradas dad *Andrea Badrutt* (Cuera).

Ina historia da famiglia senza tablas genealogicas restass denton in labirint. Grazia agl engaschament digl anteriur scolast, president communal ed archivar *Rest Cundrau Demont* (Vella) e dalla examinaziun critica dad *Adolf Collenberg* (Trin/Morissen) e l'elavuraziun grafica da *Paul Herrmann* (Eigias) ei la monografia da famiglia arrundada cun ina gronda tabla genealogica.

Tenor Adolf Collenberg ha la publicaziun presenta persula ina considerabla valera substanziala. Ella sappi denton era esser punct da partenza per ulteriuras re-tschercas el rom pli stretg ni pli lartg dalla historia da vitg e val.

Bundi Martin: *Familiengeschichte der von Mont aus dem Lugnez*. Ediziun Calven 2011. ISBN 978-3-905261-37-0. 255 paginas. Prezi: 69 francs.



Caulgia Gallus de Mont (1537–1608).



Baron Peter Anton de Mont († 1800).



Capitani Melchior de Mont (1646).



General Giusep Luregn Demont (1747–1826).